

國初群雄事略

○

○

國
初
年
雄
事
志

國初群雄事略

著者 (清) 錢謙益

出版者 江蘇廣陵古籍刻印社

發行者 揚州市古籍書店

定價 宣紙本六十七元整

出版時間 一九八一年九月

統書號 一一一〇〇(古)〇五

國初羣雄事略卷十

虞山錢謙益牧齋甫編

光祿大夫中書平章政事李思齊

思齊字世賢汝寧羅山縣人累官銀青光祿大夫太尉
中書平章政事兼知樞密院事封許國公洪武二年來
降授資善大夫江西行省左丞三年除榮祿大夫中書
平章政事七年九月四日卒年五十二

至正十二年

壬辰

察罕帖木兒與信陽之羅山人李思齊同起

義兵襲破羅山授察罕帖木兒爲汝寧府達魯花赤思齊汝

寧府知府

元史

當元之季汝潁兵起公招集義旅數平郡縣官中順大夫汝

寧府知府 宋濂撰平章李公權厝志

羅山縣典史李思齊與察罕克復羅山縣 庚申外史

十七年 丁酉二月察罕帖木兒與李思齊以兵自虢援陝西以

察罕帖木兒為陝西行省左丞思齊為四川行省右丞 元史

十八年 戊戌正月察罕帖木兒李思齊合兵於鳳翔是月詔察

罕帖木兒屯陝西思齊屯鳳翔

四月察罕帖木兒李思齊會宣慰張良弼等討李喜喜於鞏

昌喜喜敗入蜀察罕帖木兒駐清湫李思齊駐斜坡張良弼

駐秦州郭擇善駐崇信拜帖木兒等駐通渭定住駐臨洮各

自除路府州縣官徵納軍需李思齊張良弼同謀襲殺拜帖

木兒分總其兵五月思齊殺同僉樞密院事郭擇善

二十一年辛丑正月李思齊進兵平伏羌縣等處

五月癸丑四川明玉珍陷嘉定等路李思齊遣兵擊敗之是月李思齊受李武崔德等降

明玉珍陷嘉定在十八年實錄

九月四川賊兵陷東川郡縣李思齊調兵擊之

十一月察罕帖木兒李思齊遣兵圍鹿臺攻張良弼詔和解之俾各還信地兵乃解

二十二年壬寅正月詔李思齊討四川張良弼平襄漢時兩軍不和故有是命

二月知樞密院事禿堅帖木兒奉詔諭李思齊討四川時思齊退保鳳翔使至進兵益門鎮使還復歸鳳翔三月遣兵攻

張良弼至于武功良弼以伏兵大破之

六月戊子田豐王士誠刺殺察罕帖木兒

二十三年

癸卯

四月孛羅帖木兒李思齊互相交兵六月孛羅

帖木兒方奉詔討襄漢擴廓帖木兒部將歹驢等駐兵藍田七盤思齊攻圍興平遂據整屋踵襲其後孛羅帖木兒遣竹貞等入陝西據其省治擴廓帖木兒遣部將豹高與思齊合兵攻之竹貞出降

二十五年

乙巳

正月癸亥封李思齊爲許國公

三月皇太子下令于擴廓帖木兒軍中以孛羅帖木兒襲據京師命擴廓帖木兒及陝西平章政事李思齊各統軍馬奮義恢復六月皇太子加李思齊銀青榮祿大夫郊國公中書

平章政事皇太子詹事兼四川行樞密院事

進保關陝歷官至銀青光祿大夫太尉中書平章政事兼

知樞密院事全境安民衛元社稷其功爲

權厝志

二十六年

丙午

二月擴廓帖木兒還河南調度各處軍馬陝西

張良弼拒命李思齊脫烈伯孔興等兵皆與良弼合

初李思齊與察罕帖木兒同起義師齒位相等及是擴廓

帖木兒總其兵思齊心不能平而張良弼首拒命孔興脫

列伯等亦皆以功自持請別爲一軍莫肯統屬擴廓帖木

兒乃遣關保虎林赤以兵西攻良弼于鹿臺而思齊亦與

良弼合兵連不能罷

元史察罕傳

七月甲申以李思齊爲太尉

國朝通志卷之十一
是月擴廓帖木兒遣關保虎林赤合兵渡河會竹貞商嵩且
約李思齊以攻張良弼良弼遣子弟質于思齊以求援良弼
拒守關保等不利思齊請詔和解之

九月李思齊兵下鹽井獲川賊余繼隆誅之禮部侍郎滿尙
賓吏部侍郎掩篤刺哈自鳳翔還京師先是尙賓等持詔諭
思齊開通川蜀道路思齊方兵爭不奉詔留鳳翔一年至是
始還

二十七年丁未三月李思齊張良弼脫列伯自會于含元殿基
推李思齊爲盟主同拒擴廓帖木兒

五月李思齊遣張良弼部將郭謙等守黃連寨關保虎林赤
等引兵拔其寨郭謙走會貊高等爲變關保虎林赤夜遁李

思齊速解而西

六月李思齊據長安與商嵩拒戰侯伯顏達世進兵攻李思齊秦州守將蕭公達降思齊思齊知關保等兵退遣蔡琳等破其營侯伯顏達世奔潰

七月李思齊遣許國佐辭穆飛會張良弼脫列伯兵屯于華陰時命禿魯爲陝西行省左丞相思齊不悅遣其部將鄭應祥等守陝西而自還鳳翔

八月詔命皇太子親出總天下軍馬而分命擴廓帖木兒自潼關以東肅清江淮李思齊自鳳翔以西進取川蜀禿魯與張良弼孔興脫列伯等取襄樊

十二月詔陝西行省左丞相禿魯總統張良弼脫列伯孔興

各枝軍馬以李思齊爲副總統統禦關中撫安軍民脫列伯
孔興等出潼關及取順便山路渡黃河合勢東行共勤王事
思齊等皆不奉命

是歲詔分潼關以西屬李思齊以東屬擴廓帖木兒各罷兵
還鎮於是關保退屯潞州商曷留屯潼關

以上俱元史

是歲十月丙辰遣使以書諭元將李思齊張思道

實錄

書曰曩者元君失馭天下土崩羣雄欲成霸功者甚眾然
處非其地徒擾擾以傷民今十有七年矣功業之建概乎
無聞邇者吾將軍傅友德守徐州師至中灤獲王保保部
將始知二公割據秦中而王氏亦已守之三分其險數年
之間民無一定之歸使人旁觀似無智者以吾料之非智

不足也患在因循假元君之舊號決智不速而使民橫遭塗炭耳區區雖昧於見聞然嘗與高明長者才能之士論訪海內形勢天運去留之幾頗知一二況人之常言天道所助者在德地利可據者在險今百二山河二公割據不相上下必欲相爲觴角分富貴於其中恐可保其暫未可保其終也今吾不畏二公之怒直辭相告二公當揣其福德威力足慰民望者推一人爲尊撫定關中以一民心擁精兵守要害虎視太行之東大河南北使君尊於上公卿將相各安於下家樂其業人全其生不亦可乎若乃各據一隅以殺戮相高雖快志一時必有不測之禍脫有不虞身名俱滅比之屈節揣分尊朋友有德者爲君己爲公卿

將相永保功名富貴其賢不肖豈不大相遠哉若吾以用兵爭強之事相告使二公彼此角力以決雌雄是秦民未有休息之日終非賢人君子知天運者之所爲今以相尊相讓之事告二公者蓋欲休兵息民爲二公之福不淺也二公當度之揣之其勢其德可尊者誰苟爲不然鷸蚌相持漁者獲利悔將無及

洪武元年

二十八年

戊申

二月詔削擴廓帖木兒爵邑命禿魯李思齊等

討之是月

大明兵已至河南李思齊張良弼等解兵西還

思齊次渭陽良弼次櫟陽

時李思齊張良弼孔興脫列伯與擴廓相持日久大明兵

已至河南思齊良弼皆遣使詣擴廓告以出師非本心乃解兵大掠西歸

元史察罕傳

三月 大明兵取河南李思齊張良弼會兵駐潼關火焚良弼營思齊移軍葫蘆灘調所部張德欽穆辭飛守潼關 大明兵入潼關攻李思齊營思齊棄輜重奔于鳳翔

元史

四月甲子馮宗異進攻潼關李思齊張思道棄關宵遁初思齊與思道聞王師取河南卽駐兵潼關以拒旣而火焚思道營思齊乃移軍退守葫蘆灘遣部將張德欽穆辭飛守關及王師至思齊棄輜重走鳳翔思道奔鄜城丙寅宗異遂入潼關引兵西取華州

實錄

大軍攻潼關張李脫孔四軍皆潰而西

庚申外史

思齊思道各擁大眾來武功東川而軍思齊在東思道在
西以禦我軍

鴻猷錄

五月李克彝棄河南城奔陝西推李思齊爲總兵駐兵岐山
是月李思齊部將忽林赤脫脫張意據盤屋商曷據武功李
克彝據岐山任從政據隴州七月李思齊會李克彝商曷張
意脫列伯於鳳翔

元太尉李思齊守鳳翔總轄山外二十四州之地 上察

參政孫希孟都府經歷王均美等與侍衛指揮毛驥張煥
盟爲昆季飲生雞血酒爲誓 上疑之鞭希孟均美遣齎

敕往諭思齊思齊不聽縛于陝西菜市副之

俞本記事錄

閏七月丁巳詔李思齊南出七盤金商圖復汴洛與擴廓帖

木兒等四道進兵思齊兵未出擴廓帖木兒退守太原是月

丙寅帝北奔八月庚午大明兵入元都

元史

洪武二年己酉三月庚子大將軍師至鹿臺遂入奉元路癸卯

副將軍遇春宗異發陝西進取鳳翔丙午李思齊奔臨洮

實錄

元太尉李思齊總關陝秦隴之兵西至吐蕃南至礮頭關東至商雒北至環慶皆思齊主之精兵不下十餘萬聞大

軍至棄陝西之鳳翔陝西父老迎達降

俞本記事錄

初李思齊據鳳翔副將許國英穆辭飛等守關中張思道孔興脫列伯金牌張龍濟民李景春等駐鹿臺以衛秦元及大兵入關思道等先三日進野魚口遁去師至鳳翔李思齊懼率所部十餘萬西奔臨洮遇春獲其部將辭平章

等實錄

四月丁丑右副將軍宗異師至臨洮李思齊降

大軍呼李思齊至鳳翔遇春軍至思齊已遁至固關見萬木夾道遣人砍木截路以阻襲軍遇春令軍士步者攀崖踰嶺騎士斷木焚之四月至鞏昌土官汪靈真保降十二月達遣馮勝追思齊至臨洮土官平章趙脫兒挾思齊出降達以金吾衛指揮潘尋守之令騎士送思齊靈真保脫兒三人赴京

俞本記事錄

大將軍在鳳翔議師所向諸將咸以張思道之才不如李思齊慶陽易于臨洮欲先由豳州取慶陽然後從隴西攻臨洮達曰不然思道城險而兵悍未易猝拔臨洮之地西